



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim

tiryimiyim@aolima

tir yimiyim

TAPAK 8

US-i Israel nem sen \$1bn military teyari agütsütsü sentong yangludat

Babar Azam-i Kohli ajateta otsü tasen ka yangluogo



VOL. XXI ISSUE NO. 213 (ADOK 213) DIMAPUR YANGTEPNÜ (THURSDAY) MONUPII (MAY) 16, 2024 ₹ 5.00

Slovakia PM Robert Fico taküm agütsü merang CAA kübok nisung 14 nem Citizenship Certificates agütsüogo



Handlova, May 15, 2024 (Agencies): Bodbarnü Slovakia Prime Minister Robert Fico taküm agütsü merang injang aika khaloktsü aser pa mozü kidang anepaludar. European Union tanishirtemi iba tatalokba aitsüba metetdaksüogo.

Fico ya Russia den tesentaktep tajung aliba lennir ka ta tai tongloksür aser yaküm nungi Slovakia prime minister inyaker.

"Tanü Handlova nung sorkar senden ka amenba sülen Slovak Republic nung Prime Minister, Robert Fico taküm agütsü merang" ta sorkari social media nung metetdaksü.

"Pa helicopter ajanga Banska Bystrica-i anir ogo aser pa kanga mejungi yirua lir" ta pamokisa ashi.

House of Culture kima nung arishi küm 59 tain Robert Fico dak injang pezü tashi khaloktsü aser tepok yiru.

"Prime minister amakba osang onoki jangjaogo" ta police spokesman Matej Neumann-ia ashi.

"Ozü hospital-i Fico anir aru aser vascular surgery clinic nung pa anepalu" ta Handlova local hospital director Marta Eckhardtova-ia ashi.

Dennik N daily reporter kati injang aika khaloktsüba angashi aser iba sülen security guards-i Prime Minister ajunger gari ka nung aniokba angu ta ashir.

Paisa ashiba agi police-i injang khaloktsüsang puogo.

European Parliament elections agütsü hopta asem shi lia Slovakia nung iba ya atalokogo.

Slovakia Parliament nung Deputy speaker Lubos Blaha-i iba tatalokba osang sangoktsü aser tanga tetuyuba

ka magütsü tashi Parliament anena atatsü metetdaksüogo.

Külen, Slovakia nung opposition party tongtitem-Progressive Slovakia aser Freedom and Solidarity ajanga lungkak aitba sentong ka agütsü aliba thinenogo.

"Premier Robert Fico dak injang khaloktsüba onoki khukhua aitsür. Kasa mapang onoki politicians ajak dang tensa tamajungba mekümdaksütsü asoshi o mashii mejembitsü aser mapa talila meinyaktsü ayongzüker" ta Progressive Slovakia lennir Michal Simecka-i ashi.

"Slovakia prime minister amakba ni khukhua aitsür. Iba mapang nung pa nem tashi agüjang aser tekaraba nung taneptsü angütsü moatsür" ta Slovak President Zuzana Caputova-i metetdaksü.

"Prime minister tekaratiba nung taneptsü angütsü ni imlar. Asenoki ozüng alema inyaksangshiba magizüksüla, loktiliba nung ibala mapa magizüker" ta Czechoslovakia Prime Minister Petr Fiala-ia ashi.

"Robert iba ama mapang tamajung nung ni nü den lir" ta Poland Prime Minister Donald Tusk-ia metetdaksü.

"Slovakian Prime Minister Fico taküm agütsü merangba osang angashia ni kanga aoksar. European politics nung ozüng alema inyaksangshiba mali" ta German Chancellor Olaf Scholz-ia ashi.

"Asen democracy linüktem nung tesempatep aser ozüng alema inyaksangshiba melidaksütsüla aser item anema akangakanga raratsüla" ta Austria Chancellor Karl Nehammer-ia ashi.

Fico-i 2006-10 aser 2012-18 kümsüktem nunga Prime Minister inyaka liasü. Yaküm October ita pai tasemben atema Prime Minister inyaksü tenzükba sülen o aika jembiba ajanga Slovakia aser kidanger Ukraine tsüngda tesentaktep mejungi kümogo.

NSCN-IM-i Dimapur nung nightclubs noktanger

Dimapur, May 15, 2024 (Agencies): NSCN-IM-i Dimapur nung nightclubs, pubs aser discos ajak shibangtsü tetuyuba agütsüogo. Public-i ken o aika benokba nung ajemdaker parnoki iba lemtet agi ta angazüker.

"Aonung tesü tanur tetsürtem tim masüba yimya nung ajuruba osangtem onok dangi aruogo. Ano kibong akümba teburtem aser non-local shishilembartemi sen yong masüba mapatem inyakba angashiogo" ta Union Territory NSCN (IM) Secretary Solomon Sumi-i sangdong ka nung ashi.

"Anepdang züngia tashi nightclubs, pubs aser discos lapokba ken o tem onok tsüngdang benokogo. Item tebilemstü ya süoki ia agizüksü aser item maparen azüoktsüla" ta NSCN-IM-isa metetdaksü.

"NSCN-IM UT office-isa drug shibelener aser ayokertem kümdangtsü metetdaksüogo. Lanurtem rongnung drugs achir aika kümogo aser ibaji drugs zübazüba anguba ajanga lir" ta pamokisa ashi.

Dimapur nung mozü ayokertem putetra ozüng tesashi agi merenshütsü ta NSCN-IM-isa metetdaksüogo.



May 15, 2024 nü New Delhi nung Union Home Secretary Ajay Kumar Bhalla-i citizenship certificates agütsüba angur.

New Delhi, May 15, 2024 (Agencies): Centre-i Citizenship (Amendment) Act (CAA) inyakyim tenzükter ita ana jungnüa arur tang mezüng atema citizenship certificates 14 tashi agütsüogo.

CAA kübok Pakistan, Bangladesh aser Afghanistan nungi tamangba yimsü tsütsü reshikangshi ajururtemi India senso meshitsü akok.

"Tanü Ministry of Home Affairs (MHA)-i CAA kübok certificates agütsüba maparen tenzükogo. Refugee 14 nem tenüngsang agütsür. CAA ya Prime Minister Narendra Modi-i linük dang nangzükba lir" ta Union Home Minister Amit Shah-i ashi.

Tanü Union Home Secretary Ajay Kumar Bhalla-i refugee tem nem citizenship certificates lema agütsü.

December 2019 nung Parliament nung Citizenship (Amendment) Act agizükba sülen

küm pezü lir Union Ministry of Home Affairs (MHA)-i March 11, 2024 nü CAA rules osang metetdakja liasü.

Bodbarnü nisung 14 indang applications online ajanga inyaktepba sülen citizenship certificates agütsüogo.

"Ni tanü senso kümogo aser ni kanga pelar. Ni ano maneni züngtetsü. Ni yangi 2014 küm aru aser CAA agizükdang kanga pelaa liasü. Pakistan nung onok tetsürtemi mezüngteter aser kimai meluteter. Onok kimai aludang burqa agir. India nungbo onoki züngteter, ni tanga class 11 nung azünger aser tuition agir" ta tanü citizenship certificate angur Bhavna-i ashi.

CAA ajanga Citizenship Act of 1955 yanglushir aser December 31, 2014 matongdang Afghanistan, Bangladesh aser Pakistan nungi Hindu, Sikh, Jain, Parsi, Buddhist aser Christian tem reshikangshi ajuruba ajanga

India nung arua jenoker nem senso agütsür.

India kübok tesem balala nung CAA atema o atsüteper aser nisung aikati magizüker.

Taküm March ita Pinarayi Vijayan-i aniba Kerala sorkari Supreme Court nung CAA mapa tenzüktsüba anema ken o ka benoka liasü.

Taoba ita Congress lennir P Chidambaram-ia INDIA bloc ajanga Centre nung sorkar akümba sülen mezüngbuba Parliament session nung CAA meyipa agütsü ta metetdaksüogo.

Ajisüaka Prime Minister Narendra Modi-i aniba BJP sorkari CAA mapa tenzükba atema pusema nungiter.

"Item inyakyim ajanga Pakistan, Bangladesh aser Afghanistan nung tamangba yimsü tsütsü reshikangshi tia ajururtemi asen lima nung senso kümtetsü" ta Union home minister Amit Shah-i shia liasü.

tEA-i HSSLC topper Thejazenuo Angami tushi

Kohima, May 15, 2024 (TYO): Higher Secondary School Leaving Certificate (HSSLC) tatidang nung jenang 9 buba angur Thejazenuo Angami nem the Entrepreneurs Associates (tEA) ajanga tetushi agütsüba sentong ka ayonga agiogo.

Thejazenuo ya Modern Higher Secondary School nung azünger aser tanü tEA, Head Office, Kohima nung la nem tenüngsang agütsüba sentong agi.

Thejazenuo tetsü Peteneinuo Angami ya taoba mapang street vendor ka liasü aser lai Sokhriezie Building nung Galho shop ka lapoka liasü. tEA-i Peteneinuo nem senotsü teyari agütsüogo aser lai zero-interest loans ajanga tajangzük angu.

tEA indang beneficiary ka asüba agi tanü parnoki Peteneinuo'er jala nem tetushi

agütsüba sentong ayongzükba agi.

"tEA ya asen nübertem asoshi rongsen aser maongka agütsü atema tenzükba lir. Küm 24 sülen Peteneinuo aser lar jala ajanga takok osang bentsür aruba angudang kanga pelar. Thejazenuo-i takok tulu anguba atema pelar aser lai tetsü atema konang bentsür aruba dang masü saka la kanga dang bendanga anitetba kuli sayur" ta tEA Executive Director Mrs. Neikule Doulo-i ashi.

Tanü sentong nung Thejazenuo nem senpet aser gift hamper ka agütsü.

Thejazenuo-i o jembidang la tetsü amitsür ka süaka kanga junga anitetba aser yariba atema pelaba metetdaksü.

"The Entrepreneurs Associates-i ni aser kütsü den teti

yaritepa aru aser iba atema kanga pelar" ta laisa ashi.

La St. Joseph's College, Jakhama nung azüngtsü atema admission agiogo aser Chartered Accountant ka akümtsü nükjidong yur Bachelor's Degree in Commerce azüngtsü ta Thejazenuo-isa ashi.

Peteneinuo-ia tEA dang pelaba metetdaksüdang Mao Market kitsükkirong lendong nung lar dokan rongdokdang tEA-i la yariba lemsatop.

"Asen sentongtem dang nungibo Tsüngremer sentong tajungba aser tuluba lir. Ni timtema arudang ni Pa dak tamang ayu aser tanü Pa temoatsü nung alir. Theja ama tangatet jala ka aliba ya temoatsü ka lir aser ni la asoshi kanga nüma atanger" ta Peteneinuo-isa ashi.

National Quality Assurance Standard indang orientation agi



Medical Officers, Community Health Officers aser Staff Nurses tem atema anogo ka National Quality Assurance Standard (NQAS) orientation sentong May 15, 2024 nü Conference Hall, DoHF, Kohima nung agi.

Dimapur, Monupii/May 15 (TYO): Medical Officers, Community Health Officers aser Staff Nurses tem atema anogo ka National Quality Assurance Standard (NQAS) orientation sentong May 15, 2024 nü Directorate of Health and Family Welfare indang Conference Hall, Kohima nung agia liasü.

Iba sentong tenzüka jembidang, nüburtem tenzüka ya maongka lir, anungji asenoki maongka tajung ama agizüka nungdabapur nem health care service agütsüsüla, ta Dr. E. Motsuthung Patton, Principal Director, DoHFW, Nagaland ajanga ashi.

Pai health care provider tem dang asen state nüburtem temang anema yutsüsü nükjidong nung health care tajungtiba agütsüsü ayongzük. Mission Director, National

Health Mission (NHM), Dr. Akuo Sorhie-ia linük nung Public Health Sector nung Quality Health care tali agütsüsü ayongzük.

Public health units ajanga anepaluba public health facility nung NQAS ya quality certification tematiba ta lai ashi.

NQAS indang tongtipangtiba nükjidong ya shirangertem temulung chia anepalua Public Health system nung tamang katetdaksüsü aser kasa mapang yimya shidak amshitsü lir, ta Dr. Akuo-i ashi.

Pei aliba tesem nung Health Units tem NQAS certified Health Units kumdaksüsü meranga inyaksü Dr. Sohrie-i ajungshia liasü.

Dr. Merenila Senlem, State Program Officer, NHM ajanga iba sentong nung adenertem pela agizükba mapang, National Health Policy 2017 ya

Universal Health coverage nung rangloker yanglu aser asenoki health care tajungtiba agütsüdang iba nükjidong tongtetsü ta ashi.

Ministry of Health, Government of India-ia Health Units ya NQAS Certified südaksüsü shia lir, aser iba certification ya Niti Ayog ranking atema kisüng masü saka aspirational blocks atema tongtipang lir ta lai ashi.

Iba sentong nung Dr. Kheshika Yeptho, Deputy Director, NHM menden liasü.

Nagaland nung Urban Primary Health Units asem aser Primary Health Units anati NQAS Certification ngua lir.

Government of India-i 2025 tashinung state nung Public Health NQAS shilem 50 certified asüsü aser December 2026 tashinung shilem 100 certified asüsü nükjidong lir.

Assam Rifles-i Tuensang nung World Orthodontic Health Day amung



Dimapur, Monupii/May 15 (TYO): Assam Rifles temi May 15, 2024 nü Tuensang district kübok World

Orthodontic Health Day munga liasü.

Iba sentong ya Assam Rifles Public School aser St.

John School nung ayongzüka liasü, kong kaketshir 230-i shilem agi.

India sorkar indang LiFE campaign den lirumedema iba sentong ya ayongzük aser iba mapang dental hygiene yimya shidak amshitsü sayu aser lanurtem dang oral health kanga junga anepalutsü ayongzük.

Assam Rifles temi iba ama sentong ayongzükba ngua nüburtemi pelaba lemsatap.

CP Office Dimapu ajanga NBSE toppers nem tetushi agütsü



Dimapur, Monupii/May 15 (TYO): Commissioner of Police (CP) Office Dimapur ajanga unit personnel chirtem tawa sangdongba HSLC/HSSLC Examination 2024

nung top 20 jenjang tongteter nem tetushi agütsüba sentong ka CP Office, Dimapur nung May 15, 2024 nü agia liasü.

Commissioner of Police, Dimapur unit kübok C/N

Nungshipokba'er jala Suyaben Longkumer-i HSLC nung top 10 aser C/N (Driver) Chandan Kumar Singh'er jabaso Rajnish Kumar-i HSLC nung top 18 jenjang tongteta liasü.

Mokokchung DPDB senden May 21 nü amentsü

Dimapur, Monupii/May 15 (TYO): Ita shia amenba District Planning and Development Board senden April aser May ita atema May 21, 2024 nü amentsü, ta Deputy Commissioner & Vice - Chairman, District Planning and Development Board, Mokokchung,

Thsuvisie Phoji-i sangdong ka ajanga ashi.

Senden ya anepdang 11:00 ako nungi tenzüka ADC (Planning) Conference Hall, Mokokchung nung amentsü, anungji board züngsem ajak iba senden nung arua adentsü ayongzük, ta sangdong ajangasa ashi.

Kohima DPDB senden nung elections otsü jembidi

Dimapur, Monupii/May 15 (TYO): Ita shia amenba Kohima District Planning and Development Board (DPDB) senden May 15, 2024 nü DPDB Hall, Kohima nung Deputy Commissioner and DPDB Vice Chairman, Kumar Ramnikant IAS lenisüba kübok mena liasü.

50,000 dak tema lir ta ashi. ULB election nung EVMS masü Ballot Boxes amshitsü aser tesem kar nung tensa majungtsü amai lir ta lai metetdaksü.

Lok Sabha Election mapang amalitep akaba atema Deputy Commissioner, Kohima ajanga züngsem ajunga nem tenüngsang agütsü aser ano vote azüngba anogo aser Urban Local Body (ULB) elections nunga maneni yariteptsü ajungshia liasü.

Longkumer-isa State Election Commission ajanga totuyuba tasen agütsüsü aser Ballot Box voting atema training aser awareness kanga tongtipang lir ta ashi.

Pai iba senden nung adenertem dang elections tajungtiba nung sunepa agitsü mechi ULB elections matem tashi Model Code of Conduct (MCC) alitsü ta ashi.

Village Adoption Committees (VACs) ajanga mapa tajung inyakba atema sempet agüja liasü. Iba mapang Kohima nung aliba VACs trok nungi 10 Northern Angami-I nem best performing VAC sempet agütsü aser 11 Northern Angami-II nem tanabuba jenjang agüja liasü.

Iba sentong nung HSLC topper Khushi Gupta nem tenüngsang agüja liasü, shibai Kohima district aser state nung Government High School tem nungi tematiba marks (93%) nguteta liasü.

ADC Kohima, Rhoietho Nguori-i VAC budget aser senpet timba kumsüsüla ta ashi.

La nem senpet den kulizung kaket agüja liasü. Khushi-i iba sentong nung o tatsüka jembidang tesayur, kinunger aser talisa tetsü dang pelaba lemsatapa liasü.

VAC sempet angurtem rongnungi convenor, EAC Kohima, Dr. Riku Khutso-i züngsemtem nem tenüngsang agütsü aser Advisor Kekhrie Yhome, züngsemtem aser P Khel Kohima village nungi teyari agütsüba indanga lemsatapa liasü.

Administrator & Returning Officer, Kohima Municipal Council, T. Lanusenla Longkumer-i ULB Election atema terenemshiba indang board nemo sang agütsü, koba ward 19 nung polling stations 107 nung agitsü aser voters

Executive Engineer, PHE, Rural Division ajanga department inyakyim indang nung PowerPoint presentation agütsü, kong pai Jal Jeevan Mission program, Geo-tagging of assets and works, Functional Household Tap connections aser Har Ghar Jal sangdongba indang nung rangloker iba presentation ya agüja liasü.

Nagaland CEO-i Phek semdang

Dimapur, Monupii/May 15 (TYO): Chief Electoral Officer, Nagaland, Vyasana R, IAS-i May 15, 2024 nü Phek district semdanga Deputy Commissioner & District Election Officer, Phek indang office nung EVM strong rooms aser counting hall repranga liasü.

District Election Officer, Phek, John Tsulise Sangtam lia pai item tesem ya semdanga liasü aser 2024 Lok Sabha Election agiba vote azüngtsü atema renema aliba ngua temulung asüba lemsatap.

Deputy Commissioner &

CEO ya meina Additional CEO, Awa Lorin aser Assistant CEO, Roland Merry nung or liasü.

Agniveervayu (Musician) Intake atema nübu shimtsü

Dimapur, Monupii/May 15 (TYO): Indian Air Force (IAF) ajanga Agniveervayu (Musician) Intake 01/2025 atema Recruitment Rally asoshi sangdong ka agütsüto go aser website <https://aanipathvayu.cdac.in> nung angutsü.

tembangtsü. Register süa aliba candidate tem den provisional Admit card alirtem dang July 3, 2024 nungi July 12, 2024 tsünga Recruitment Rally nung shilem agidaksüsü.

Iba rally atema web portal <https://aqnipathvayu.cdac.in> nung registration ya May 22, 2024 anepdang 11:00 ako nungi tenzüksü aser June 5, 2024 aonung 11:00 ako nung

Iba atema anogo, mapang aser tesem tejangja Provisional Admit card nung shia lir.

Jangra aliba candidate temi Indian Air Force nung mapa inyaksü atema Nagaland nungi lanur temi apply sütettsü, ta sangdong ka ajanga ashi.



New Delhi, May 15, 2024: Bodhbarnü New Delhi nung Union home secretary, Ajay Kumar Bhalla-i Citizenship (Amendment) Act kübok senso certificates agütsüdang tangokba noksa nung angur. CAA kübok tang mezüng nisung 14 nem senso certificates agütsüogo.

CAA kübok tang mezüng nisung 14 nem senso certificate agütsü

New Delhi, Monupii/May 15 (Agencies): Bodhbarnü ministry of home affairs-i tang mezüng Citizenship (Amendment) Act kübok nisung 14 nem senso certificates agütsüogo.

New Delhi nung Union home secretary, Ajay Kumar Bhalla-i nisung 14 nem sen certificates agütsüogo; online ajanga agütsüba applications reprangba sülen parnok nem linük senso agütsü, ta MEA otongdar kati metetdaksü.

Senso certificate angurtem rongnung Bhavna-i, "Tanü ni linük senso nguogo, aser ni kanga pelar. Ni maneni temaba

shisaliok bushitettsü. Ni 2014 küm yagi (India) arua liasü aser CAA agizükba mapang nung ni kanga pelaa liasü. Pakistan nungbo tetsürtemi shisaliok mebushiteter aser ayazüka aotsü kanga tasak. Ayazüka aotsüsa aküm nunga onoki temeyipangba sü meyr. India nungbo onoki shisaliok bushiteter. Tang ni class 11 nung azünger aser tuition-agir," ta ashi.

Senso certificate angur Harish Kumar-i, "Ni tesüüba küm 13-14 Delhi nung alir. Iba ya tebilemba atangji atalokba lir. Ni kanga pelar aser iba ya taküm tasen ka amai lir. Ni Centre sorkar dang kanga

pelar," ta metetdaksü.

2019 küm Parliament nung CAA agizükba sülen taküm March 11 nü Ministry of Home Affairs-i Citizenship Amendment Rules, 2024 sangdonga liasü.

2019 küm Lok Sabha aser Rajya Sabha naprongla nung CAB agizükba sülen linük Tiria agizüka Act aküm. CAA kübok Pakistan, Bangladesh aser Afghanistan linüktem nungi reshikangshi ajanga 2014 küm December 31 anogo tashi nung India-i arua jenoka alir Hindu, Khristian, Sikh, Buddhist aser Zoroastrian nung nem India senso temeden agütsütsü.

India-i Iran dang India nunger rong nung senzür 40 chiokang ta ashi

New Delhi, May 15 (Agencies): India-i Iran linük dang tesüüba ita 8 tsünga osettsüset abenba rong balala nung apuba India nunger 40 chiokang, ta shiogo.

Hombarnü Iran yimtiba, Tehran nung senden ka amendang Ports, Shipping & Waterways Minister, Sarbananda Sonowal-i Iran Foreign Minister, Hossein Amir-Abdollahian dang tepuokdak alir India nunger 40 ji chiokang, ta ashi.

Sonowal-i Iran semdangba mapang nung India-i Iran nunger Chabahar port küm ter amshitsü atema tezüngzüktep agiogo, koba ajanga India-i Central Asia linüktem den shishilembaba jenjang tajungba akümstsü.

Sonowal aser Abdollahian na senden amenba mapang nungji linük ana tesendaktep dak sendakba onük balala nung o lemtepogo.

Sonowal-i Abdollahian dang India nunger 40 prongla tepuokdak nungi chioktsü mepishiba mapang Abdollahian-i, Iran-i India nunger rong nung senzürtem pua alibaji chioktsü, ajisüaka legal tsütsü inyakyim tembangba sülen ang chioktsü, ta ashi.

India nunger rong nung

senzürtemji rong pezü- Steven, Global Cherylyn, Margol aser MSC Aries rongtem nung lia apuba lir.

Yaküm Septembr 12 nü Iranian Coast Guard-i Steven rongji pua liasü. Rong nungji ozüng alema osettsüset shibelener, ta tai tonglokja apu.

Yaküm December 11 nü Iran-i Global Cherylyn rong pua liasü aser iba rong nungji India nunger 20 liasü. Ozüng alema rong nungji totzü shibelen ta tai tonglokja liasü.

Taküm January 22 nü Margol rong nung ozüng alema totzü shibelen ta tai tonglokja apu. Rong nung apuba India nunger 12 chiok saka rong captain Sujeet Singh bo tang tashi mechiok.

Taoba ita April 13 nü MSC Aries rong apu. Iba rongji Israel den tesendaktep lir ta tai tonglokja apu. Rong nungji India nunger 17 liasü. Anogo ka dang lirbo India External Affairs Minister S Jaishankar-i Iran Foreign Minister dang India nunger ajak chiokang ta mepishia liasü. Iba sülen

India tsür deck cadet, Ann Tessa Joseph chiok aser May 9 nüa India nunger 5 chioka liasü.



May 15, 2024 nü Bengaluru nung Infosys Science Foundation trustee, N.R. Narayana Murthy-i osangbenertem den jembidang tangokba noksa nung angur.

No menden nung aliba tanur-a taküm alitsü temeden lir: SC

New Delhi, May 15 (Agencies): Tetsü no menden nung aliba tanurji taküm alitsü atema temeden lir, ta shia Bodhbarnü Supreme Court-i temepishiba ken o ka magizük.

Arrshi küm 20 aiür kati la hopta 27buba mashisa aliba tanur raksaa indoktsü atema mepishiba ken oji Supreme Court-i magizük.

May 3, 2024 nü Delhi High Court-i tanur raksaa indoktsü atema temelaba magütsüba sülen tetsürla jagi maneni SC nem kasa temepishiba ken o agüja liasü.

Supreme Court nung Justices- B R Gavai, S V N Bhatti aser Sandeep Mehta

nungeri akümbea bench-i, "Iba nungji onoki obendang magütsütettsü. No menden nung aliba tanurja taküm alitsü atema temeden lir. Nai iba nungji kechi ashir?," ta asüngdang.

Tetsürla atema ken o jembitsür jagi, Medical Termination of Pregnancy (MTP) Act nung tetsü ka atema dang shia lir, ta ashi.

Bench-isa, "Tetsürla ya joko ita 7 mashisa lir. Tanur taküm alitsü temedenji koma? Nai iba nungji kechi ashir?," ta asüngdang.

Tetsürla atema ken o jembitsür jagi, "Tanurji no menden nung lir, anungji tanurji

maso tashibo tetsü dak temeden lir. Tang mapang nung temepishiba ken o agütsülaji kanga koda masüba tensa ka nung lir. La kimaia ayazüka maluteter. La NEET exam atema class agir. Tang mapang nung lai lokti majuruteter," ta ashi.

Ajisüaka bench-i, tejashi, onoki obendang magütsütettsü, ta ashi.

Medical Termination of Pregnancy (MTP) Act kübok, medical board kati no menden nung aliba tanurji 'abnormal' ta kuli agütsüra mesüra tetsü taküm aotsüsa süra no menden nung aliba tanurji hopta 24 tashi nung raksaa indoktsü melar.

LS election shilem pezü agiba sülen INDIA teloktep tashi itta lir: Kharage

New Delhi, May 15 (Agencies): Bodhbarnü Congress Tir, Mallikarjun Kharage aser Samajwadi Party Tir, Akhilesh Yadav nati osangbenertem den jembidang Lok Sabha election nung opposition INDIA teloktepi takok angutsü, ta metetdaksü.

Kharage-isa, INDIA teloktepi takok ngua sorkar kümra ita shia sensakertem nem jang seret terer (10 kg) agütsütsü, ta nangzük.

Kharage-i, "Tang tashi nung agiba (Lok Sabha) election shilem pezü nung INDIA teloktep tashi itta lir aser nüburtemi Ato kilonser Modi sendoktsü telemteba agiogo. June 4 nü INDIA teloktepi sorkar akümstsü. Democracy aser linük temzüng kümzüktsü atema iba election ya kanga tongtibang," ta metetdaksü.

Kharage-i, democracy aser linük temzüng kümzüktsü atema election ya kanga tongtibang, ta metetdaksüba den külemi kijai tashi alia amshidar, aser ibaji ajanga tangatetba balala alir candidate tem shimba nung tetsükdaksü adoktsü, ta ashi.

Kharage-isa election timi magitetba atema tebilemstsü

akaba lemsatepa pai, constituency kar nungbo opposition party lenirtem nominations file mesüdaksü, ta ashi.

"Nü tangatetba nung ajemdaker kodaser nai kar shimtetsü? BJP lenir tain toktepa tesemtem nung opposition party lenirtem nominations file mesüdaksür. Hyderabad nung BJP nungi tetsür candidate kati tetsürtem temeyipangba sü agienja maitsü repranga liasü. Iba ya election timi agiba asü?" ta pai asüngdang.

Kasa osangbenertem senden nungji Akhilesh Yadav-i, Uttar Pradesh nung opposition INDIA teloktepi menden 79 nung takok angutsü, ta ashi.

Akhilesh Yadav-i, "June 4 nungi mapang tajung tenzüktsü aliba atema ni osangbenertem nem tenüngsang agütsür. Iba anogoji osangbenertem sademsadema inyaksü jenjang anguba anogo asütsü. Uttar Pradesh nung INDIA teloktepi menden 79 nung takok angutsü. Menden ka nung dang tokteper aser iba mendenji 'Quito' nung lir," ta ashi.



May 15, 2024 nü Anantnag district nung Lok Sabha election nüboyim sentong ka nung National Conference Tir, Farooq Abdullah agizükdang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, MAY (MONUPII) 16, 2024

Naga yimten lemtet anogo

1 951 kum May 16 ya Naga National Council (NNC) leniba nung Naga nungter plebiscite agiba anogo liasü. Plebiscite tetezü yimten onük tongtibang ka nung nübertem ajaki shilem agia telemtetba agiba dang ajar. Aji oda, Naga nungter tema India yimten küboksa alitsü asü mesüra Naga yimten balaka lateter alitsü ta asüba onük nung Naga nungter ajaki shilem agia telemtetba agiba anogoji May 16, 1951 ya liasü. Atangji, tanü putu nung asübo tesem ajaklen osang tejangja metetdaksür United Nations ama nungia kuliser jaoka Naga nungter yimten jenjang latetsüba sentongji agila, ajisüaka 1951 tashi nung Naga nungter asoshi yamaji agitsüba tasak dang masü saka tamakoktsü liasü. 1918 kum Naga Club tenzüka Naga nungter nem yimten nüchiso jenjang balaka agütsütsü tim ta British yimli kübok India yimten jenjang asadanger Simon Commission nem 1929 kum tezüba nung agütsüba sülen kecha ola maka talangka arur külen, Naga Hills District nung British nungter Deputy Commissioner C.R.Pawsey-i anepalua 1945 kum Naga Hills District Tribal Council tenzüka. Naga Hills District Tribal Council tenzütsüba nükjidong ya tanabuba alima rara tembangba den külemi British nungter tema India toktsür aotsüsa mapang anasa aruba mapang ka nung, Naga nungter tema parnoki aginüba amato yimten nüchiso anguba kin balaka mesüaka India kübok yimten jenjang balala nung alitsüsa inyakyim tenzütsüba sentong ka liasü südi. Ano, aji dang masü saka tanabuba alima rara nung raksaba aser benjaba mapatem aika benteta inyaka aotsü atema Naga nungter telongjem ka nungdaka liasü südi. Ajisüaka, Naga Hills District Tribal Council tenzüker kümnabuba iba Council senden alidangbo tenünga Naga National Council (NNC) ta melen aser Wb.T.Aliba Imti Ao mezüng NNC tir ser nükjidonga Naga nungter yimten nüchiso atema inyaksü lemtet. Iba telemtetba ya mapa akümtsü atema tejembia junga mejembijongi lia 1947 kum August nungbo British yimten talenba nungi India salatsüsa aküm, anungji aritepa India dang jilia 1947 kum August 14 nung NNC teloki Naga yimten nüchiso nguogo ta sangdong. Ibaji Indian National Congress teloki 1930 kum January 26 nü India yimten nüchiso 'Purna Swaraj' nguogo ta parnoksa sangdongba amai liasü. Ajisüaka, tangari memetet peisasa sangdongba ka dang asünungji, 1947 kum August 14 nü Naga yimten nüchiso sangdongba telemtetba to mapa küma moutetba agi, iba sangdong aser telemtetbaji Naga nungter temi mulunger asü memelunger ta Naga nungter temi vote agütsütepba Plebiscite anogoji pezübuba NNC tir A.Z.Phizo leniba nung agia liasü. Atangji, plebiscite vote agütsüba tanü vote agütsüba yimya nung masü saka pei angatetba nung temeyong nema agiba sentong ka liasü. Aji oda, temetenbo pei temeten jangjashia yimten telemtetba agiba anogo saka alimai agizüktetsüsa tangar kintem nungia kuliser lia agiba yimten sentong ka masü asünungji, tanü tashi 1947 kum August 14 nü Naga yimten nüchiso sangdongba aser 1951 kum Plebiscite agia lemtetba ken o temji mapa küma moutet Naga nungter temi kangshir. Iba ama yimten tensa tia ka nung Naga nungter temi pei yimten temeten mezüngmeshi mesüi August 14 aser May 16 anogotem ya Naga yimten süiren nung tongtibang anogotema ta mamadoki bilemteta amongba ajanga Naga nungter, talisa lanurtem rongnung Naga yimten tangatetba jenjang tali tashi itshitsü. Aji oda, Israel nungter temi Babylon yimten kübok tepuoker küma alidanga Yirusalem mamadok ama, tanü Naga nungter tema tangar yimten aser tamangba yimsü kübok tepuoker ama kümer, telok tilala paikaya lemsar liaka, asenoki August 14 aser May 16 na ya mamadoki Naga yimten temeten indang jembia Tsüngrem den indangindanga litetra, atangji, Naga nungter tema kenübo nüchi akümtsü.


OLEMSABANG

LATE SUBONGNUKLU TAKÜM OTSÜ

~ Mrs. Meyisongla, Rtd. Deputy Director, Nursing Kohima.

(Yashi adok nungi...)

Iba mapang nong Mr. Lyod Reeves SDO (C) Mongsenyimti yimdak Oak Bangalo nong alua anen. Rtd Dobashi Onglinago tena, parnok Longjangi aluba ajurua, Mr. Subongnuklu aser Dobashi Limaangzük Mongsenyimti tenati meina Longjangi alu. Lemang nong taludang Subongnuklui, SDO ba dang iba Ao student mungdang tenzuktsü indang aser parnok nükjidong indang (Aims & Object) shia alu. Idangjisa SDO (C) tepang agi iba mungdang akatsü mela saka iba programmji hapta ka jilia lia copy ka kü nema agujang ta ashi.



Iba mungdangji akatsü Longkhum nonger dang asüngdangba, parnoki molungsua iba mungdang akatsü melaji bai April ita 1927 nong liasü. Ao lima Longkhum nongerji tashir aser takar lima nong Ao student mungdang (conference) December 1929 kum aka.

- Menden :- Mr. Subongnuklu (DACCA) Mongsenyimti
- Teyariba :- Mr. Nokdenlemba, Waromung Shillong
- Tezuluba :- Mr. Longrikaba, Changki Dibrugarh
- Teyariba :- Mr. Kijungluba, Lirmen Shillong
- Senyur :- Mr. Sendonglemba, Gauhati
- Teyariba :- Mr. Imkongliba, Ao Nukpu Shillong

N.B:- Mr. Subongnuklu DACCA nongi ayong tulu, Rong tila nong asemben pezuben ajanger Assam nong train agi ano Nagaland nongbo tetsüng agi ta anügo ainü leman nong senzüdang mungdang memeneppi menden yarisangi mungdangji agia iba mungdang takok tulu ngua aka. Parnok mendenpur dangji Ao student mungdang nguteterem ka aja.

No.2: Mr. Subongnuklu, Ao milen osang kakat tenzüka otsü.

Tsüngremi Mr. Subongnuklu shisatsü aser koluk nong tarutsü Aor tia ajungtsü meji nong tebelemba tajung aika agütsü. Pa Dacca Engineering azüngdang. Jukender (Bengali oshi osang), Bengal gazette, Statesmen. Tapti Assamese News kakat tejentem ajak mejiptena bener, sodi ita ana agir pa temba Longritangjetba ajurutsü asen lemai aru. Pai tetsüng agi Mongsenyimti - Mopungchuket - Khar Lushi ajanga rack sack tejen ka nong halfpant ka, tola tejenka aser sapen tagituh telaka bener pa temba Longritangjetba Changki yimdak ajurua, pai bena aliba news paper tejentemji lushia sayu. Aser asen Ao oshi nong osang kakat kabo adoktsüla ta jembir. Asüngnepji Waromung yimdaki atu. Asempuba Ao senden mungdang nong pa temba Longritangjetbaji mendenpuba liasü. Pai iba indang süoka jembir, saka parnok rongnung opang mapu adok, osang kakat ka atoktsü temela masü British Govt-i. iba kakat adoktsü memelatsü aser parnoki Ao senden mungdang shipangtsütsü kari ashir aji kechi osangsa adoktsü? kong menüngtsü aser iba senji shipai agutsütsü koma alemtsü ta shisa bulutep. Saka kodang menden pubai Subongnuklu bener aruba news paper tejentemji rasa ashi, telokjagi junga belem. Saka aji asaktsü ta sentipji shipang, saka Subongnuklu tezü medangi mendenpurtemji ajurua angateta ashi, parnokji Longritangjetba, Ajangbo, Sosangchetba aser Nokdenlemba nur liasü. Parnok ajaki molunga osang kakatji adoktsü ta lemtet. Aser P.R Wickstunt iba osang kakat tenüngji Aor MESSANGER ta ajatsü ta ashi. Aser iba osang kakatji 28.1.1933 kum tama adok. Ibai Nagalima aser Northeast nong osang kakat mezüng adok asütsü südi.

Impur nong Ao student amungdangji Aor messenger melen Ao Milen ta ajatsü lemtea tanü tashi Ao Milen ta ja-a osangtsüsang tapu ajak prokshia Aor dang masü tangar kena aikati iba paper azünger. Ibajagi Subongnuklu dang Ao student mungdang aser Ao Milen paper ngutetsang ta ajar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Assam nung police-i Tenla ki mita aoba anentsü UCF-i akhanger



Karbi Anglong district kübok Diphu nung aliba Tenla ki ka noksa nung angur.

May 15, 2024: Assam state nung Khristan forum kati district ketdangsertem dang police-i Tenla kitem mita aoba anentsü takhangba agütsüogo.

May 14, 2024 nü United Christian Forum (UCF)-i temepishiba shidi ka ajanga district ketdangsertem dang, tesüiba hopta Karbi Anglong district kübok Diphu nung police-i Arogotem osang bendenba ashishia metetdaksü.

District Commissioner, Madhumita Bhagawati dangi züluba shidi nungji UCF-i uniform semer police-i temelaba magii Tenla ki telungi mita repranger ta metetdakja lir.

UCF-isa, police-i Tenla ki noksa tangoker aser Arogo züngsemtem dang

asüngdangyar, ta ashi.

2022 küm December ita nunga police-i Khristantem, Arogotem aser Khristan rejutem dak sendakba osang bendenba liasü, ta UCF-isa metetdaksü.

Khristantemi ibaji ashishia liasü, ajisüaka state Chief Minister Himanta Biswa Sarma-iba osangji magizüki liasü, ta parnoki metetdaksü.

2023 küm June ita nung ang official sangdang ka ajanga, Khristantem aser Arogotem indang survey agitsü atema memeteti tuyur liasü, anungji jelia osang memetetdaksüü mesüra official tetuyuba makaibo item ama survey magitsü, ta metetdakja liasü.

Tang tesüsa police-i Tenla kitem mita aoba ajanga ozü

nüburtem (Khristantem) tsübudaktsür, ta UCF Tir, Rev. Solomon Rongpi-i metetdaksü.

"Talisa temeshi tesemtem aser tekülem kitemji nüburtem tekülem agitsü aser sarasademtsü atema lir, anungji item ama temeshi kitemji ajaki akhümtsübuttsüla," ta paisa shisem.

UCF-isa Bhagawati dang, nüburtem tesünep nung alitsü atema tangsa police-i Tenla kitem mita aobaji nokdangang, ta takhangba agütsü.

Ano külen district police-ibo, parnoki survey agibaji Khristan rejutem kümzüka ayutsü aser Khristantem kümzüksü atema lir, ta metetdaksü.

Nütsüng million 31 aliba Assam nung nütsüng shilem 3.74 dang Khristantem lir.

ANO GO ABEN TSÜNGREM DEN

SARASADEM TELONGJEM NUNG TASHI

Adianutem, ni nenok dang...maneni sarasademjang ta mepishir, Anungji Tsüngremi mulungba süra ni nenok dangi pelashishia arua nenok süngzükdaksütsü. Rom 15:30, 32

Sarasadem ya teyanglur Tsüngrem den sensaksemba lir. Dawid chubai Tsüngrem dang mapang ajak nung pa aser nübur asoshi mepishi aser Pai angashi. Iba temoatsü aser leniba kübok pai yimsü asü. Tenyar Pauli Rom nung aliba tamangertem dang 'kati ka asoshi sarasademtsü aser temeim nung ajungmesoteptsü indang zülua lir. Tangar dak tenükmerema bilemba tatitang nungi jembua alitsü aser tamanger o tamanger na tsükchitepa kati ka arishia malitsü indang jembir.

Pauli pa tongpang nung noktaka aliba mapang tamangertem külem telongjem sarasadem nung tashi lir ta metet nung pai tamangertem sarasadem kanga nungdaka mepishia asüngdang. Yamaji tanü asen taküm nung tebilemstsü, tongpang balala ajurur, aser item tongpang mung raratsu asoshi külem tamangertem telongjem Sarasadem kanga nungdaker. Külemi longjemmer inyakba nung takok tulu lir. Sarasadem asen sobutsü sür Pa den Jajadi, kechiaser sarasadem telongjem nung Tsüngrem ain, tashi aser temoatsü talubosa lir, amanga sarasademdi.

Baptist Association kati Papua New Guinea nung Goroka Project tenzüker

May 15, 2024: Association of Baptists for World Evangelism (ABWE)-i Papua New Guinea nung theological education jenjang ajungkettsütsü nükjidong nung Baptist college & clinic ka yanglushitsütsü atema dollar sen million 7 indoktsü telemtetba agiogo.

Papua New Guinea nung asetkong 600 lir aser oshi 800 dak tema jembir.

Alima nung mission inyakba agency ABWE-i alima tesem balalai missionary tem yoktsü asoshi Arogotem den longjemmer inyaker. Arogo tasen amenoktsütsü aser mission mapa inyaktsü atema tang ABWE ya linük 84 nung lir.

ABWE-i Papua New Guinea nung aliba Goroka Baptist Bible College aser Seigu Baptist Clinic ulushitsütsü aser yanglushitsütsü atema dollar sen million 7 bushitsü telemtetba agiba sülen tang tashi nung parnoki million 1.2 bo bendentetogo.

"Goroka Project kübok theological education jenjang ajungkettsütsü den külemi evangelistic

ministry ajanga taküm aika melenshidaktsüba den külemi linük-a melenshidaktsütsü," ta ABWE-i sangdong ka ajanga metetdaksü.

Mapang talangka nungi Papua New Guinea nungi missionary inyaker, Bill Smith-i, Papua New Guinea nung tanela jenjangji Khristan yimsü dak metaloka lir, ajisüaka tashi meiti lir, ta ashi.

Paisa, "Parnoki Khrista indang terabo meteta lir, ajisüaka parnok indang Khristan tangatetbaji chichiba masü, aser ibaji kanga tasak. Khenkenbo parnok kümzüksü atema parnok samatsütsüsa akümer," ta ashi.

Association of Baptists for World Evangelism Tir, Paul Davis-i, "Papua New Guinea tesem ajaklen Khrista osangtajungbo prokogo aser asetkong 600 nungji nütsüngsüba mapa ano metembang," ta metetdaksü.

"Iba mapa ya anüolen nungi missionary temi dang masü saka talisa Papua New Guinea nung nem Kibuba angatetdakja training junga agütsüba ajanga dang wadang renemtsü," ta pai ashi.

Davis-i, iba nükjidongji ataloktsü atema asalentong tajungtibaji Goroka Baptist Bible College ulushitsütsüla aser theological education jenjang ajungkettsütsüla, ta ashi.

"Goroka Baptist Bible College indang tongti nükjidongji asüng Khristan lenirtem aika adokdaksütsü atema tanü training agütsütsü asoshi lir," ta Smith-i ashi.

"Onoki tarutsü putu atema lenirtem renemtsür. Iba ya pastor tem nem training agütsüba dang masü saka medical nung inyaker tem nem-a training agüja Tsüngremi parnok sempet balala amshitsü asoshi lir," ta paisa metetdaksü.

Goroka Baptist Bible College nung Student Affairs tatong tir, Solomon Kinamat-i, "Ochimashi kanga aliba linük ka nung organization nükjidongji Khristantem ochishir lenirtem kümdaktsütsü atema lir," ta metetdaksü.

Seigu clinic nung missionary, Lori Smith-i, "Yangi Papua New Guinea nung nüburtem ket nung Band aid-a mali aser aspirin mozü-a mali.

Parnok ket nung kecha mali aser parnoki nungdak mapang nung onok clinic-i arur. Idangyongjisa onok mapa ajanga Yisu Khrista temeim jungkai adoka parnoki Khrista temeim angateter," ta ashi.

Laisa, "Clinic ajak nung Khrista osangtajung tenzüker, iba sülen anogo piyong telok tilala lemsar parnok nem telemtetba agidaktsütsü asoshi Khrista osangtajung a n g a t e d a k t s ü t s ü meranger. Parnoki telemtetba agira Khrista agizüker," ta ashi.

Küm 50 tejaklen Papua New Guinea nung Bible college ya lapoka liasü aser iba college nung Papua Guinea nung 500 jungnüabo graduate asüba sülen province 16 nung aliba local Arogotem nung inyakdar.

Ano külen 1991 küm nungi Seigu Clinic nunga missionary temi nisung 20,000 dak tema yariogo.

Joko küm aika süia arudang Goroka Baptist Bible College aser Seigu Clinic naprongla nung facilities yanglushitsü aser ajungkettsütsüsa akümer.

Goroka Project kübok Bible college nung ano student 200 tali asemtsüsa kiojen ulushitsü aser Saigu Clinic bo tasen süshiba den külemi tuluba süzüksü.

ABWE-i sangdong ka ajanga, "Yisu Khristai Par nütsüngtem alima tatembang tashi yokba mapang nung Pa melungjang nung Papua New Guinea ama tesemtem-a bilemer alitsü. Southwestern Pacific nung kanga tezülen aliba Papua New Guinea aser asetkong 600 nung kin tsüngda mangatetep adoker aser parnoki Khristan yimsü anojunga memetet. Itemji ajanga tanela tsütsü tongbang rarar aser Arogo tashi meitdaksür," ta metetdaksü.

"Tashiyim amshia raksatsüba kanga bulua ataloker, meimchir ka taküm indang tesayuba tai agütsür, aser ibaji ajanga tanur raksaa indokba kanga bulur, kinü tanurtem sendoker aser tetsürtem maaksüdaksür," ta ABWE website ajanga metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Süngsama

(n) yim o alangdak / yimten adenshidak (platform made of logs used as village court)

* Süngsama nung jembiba o nung meyzür.

Süngsang

(n) süngdong nung kongsang (branches)

* Süngdong nung süngsang melepdoki yutsütsüla.

OLONG PAITEP # 6788

	1			2			3		4
5							6		
7			8						
							9		
		10							
11									12
					13				
					14				
15									

TIPIEN

- 1. Balaka
- 6. Aika shirangba
- 7. Tar tatsü
- 9. Nenü'er jabaso
- 10. Sen latettsüba
- 11. Tangar kübok alir
- 14. Lon nung inokba
- 15. Tzü ayimdak
- 16. Ajok

LANGTSÜNGLEN

- 2. Hai sür inyak
- 3. Aor tenüng ka
- 4. Ali telungi talangka lur
- 5. Tebang kenyongi mazüoker
- 8. Ken alema anenzükertem
- 9. Toktepa noktak
- 10. Sen
- 11. Benjong agi
- 12. Telung nung rizünga ayu
- 13. Tebang nung enok

OLONG PAITEP # 6787 TELANGZÜBA

TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu,
- 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak,
- 10. Aonung, 11. Dokan,
- 13. Tinu.

NAI-A YA METETTER MA



Nüngtugu Nepali mountaineer Kami Rita Sherpa-i Mount Everest kolaki 29 ben buba atema tutetba otsü tasen ka yangluogo. Arishi küm 54 tain Kami-i May 12, 2024 anepdang 7:25 ako nung 8,849-meter summit tonga atu. Kami Rita Sherpa-i 1992 küm nungi tenem kolaki atutsü tenzük aser pai K2, Cho Oyu, Lhotse aser Manaslu tenem kolaktemia tuogo.

Sorkari Manipuri pony wazüka ayutsü atema ali acre 30 agütsür

Imphal, May 15, 2024

(Agencies): Manipur sorkari Manipuri pony wazüka ayutsü atema ali acre 30 tashi agütsüogo.

Kor mesükba pony ya Manipur aser Assam nung kanga bulua angur aser Lamphelpat, Imphal West nung ali agütsü.

"Manipuri Pony wazüka ayutsü atema sorkari Lamphelpat nung ali acre 30 tashi agütsüogo. Iba tesem nung kor tilatem sadema senzütsü aser chiyimtsü. Manipur state

sorkari Manipuri Pony kümzüka ayutsü atema mapa balala inyaka arur kechiyong iba ya state putiotsü aser sobaliba den sendaktepa lir" ta CM Biren Singh-i ashi.

"Asenoki alima nem Morden polo agütsü aser iba shiruru ya kanga tongtipang asüba agi wazüka ayutsü nüngdaker. Manipur Horse Riding and Polo Association-i tesamatsü jenjang nung aliba Manipuri Pony kümzüka ayutsü merangba atema tenüngsang agütsür" ta paisa ashi.

2016 küm Manipur state sorkari Manipur Pony Conservation and Development Policy agizük.

2003 livestock census nung Manipur Pony 1898 liasü saka 2012 census nungbo 1101 dang ajema kümer aliba nung ajemdaker sorkari iba policy ya yanglu.

January 2023 nung Union Home Minister Amit Shah-i Ibudhou Marjing nung feet 122 talang kürazyanglu ka sayaja liasü. Iba nung polo player ka pony ka nung mener tangoka lir.

Guwahati Airport nung Indonesia nunger ka ket nung cocaine apu

Guwahati, May 15, 2024

(Agencies): Lokpriya Gopinath Bordoloi International Airport (LGBI Airport) nung Customs department ketdangsürtemi cocaine shibelener ka puogo.

Iba nisung ya Indonesia nunger Reinhard Sirait ta jangjaogo. Pa ya arishi küm 33

tain lir aser Jakarta, Indonesia nungi lir.

Sirait-i taseptsü tilala aika nung cocaine enoker pa tepok telung nung bena aliba ketdangsürtemi putet.

Pa apuba sülen Kamrup Metro District Chief Judicial Magistrate tetuyuba kübok Gauhati Medical College

Hospital (GMCH)-i anir ao.

GMCH nung pa dak surgery agidang cocaine enokba pallets 36 tashi agitet aser pallet shiaji gram 10 shi touzük liasü.

Sirait-i bena aliba cocaine ji sen crore aika jenjang asütsü ta ketdangsürtemi asandangtetogo aser maneni bushisüngdang südar.

Changlang district nung NSCN (IM) züngsem ka apu



Itanagar, May 15, 2024

(Agencies): Arunachal Pradesh kübok Changlang district nung sepaitemi NSCN (IM) züngsem ka apu.

Osang tejangja ka

angazükba sülen May 13 nü 31 Assam Rifles aser state police-i Laktong nung mita ao.

Idangji parnoki sergeant Wangmun Khimhun apu aser pa ya Changlang district kübok

Yanman nunger lir ta jangjaogo.

Pa ya NSCN (IM) züngsem ka aser Changlang police station nung agütsüogo aser police-i pa dang maneni asüngdangya südar.

GOVERNMENT OF NAGALAND
DIRECTORATE OF WOMEN RESOURCE DEVELOPMENT
NAGALAND: : KOHIMA.

NO.DWRD/DEV/MTC-4/2021/265

Dated Kohima, the 14th May 2024

ADVERTISEMENT

The Department of Women Resource Development invites female applicants who are willing to undergo training under the following trades during 2024-25.

1. Cutting & Tailoring: under Multi-Training Centre (MTC) Kohima & Dimapur		
1	Course Duration	June – February (8 Months)
2	Eligibility Criteria	Class VIII Passed Age: 18 – 35 (as on 1 May 2024)
2. Knitting: under Multi-Training Centre (MTC) Kohima & Dimapur		
1	Course Duration	June - February (8 Months)
2	Eligibility Criteria	Class VI Passed Age: 18 – 35 (as on 1 May 2024)
3. Baking & Confectionery: under Multi-Training Centre (MTC) Kohima		
1	Course Duration	June – August (3 Months)
2	Eligibility Criteria	Class X Passed Age: 18 – 35 (as on 1 May 2024)
4. Hairstyling: under Multi-Training Centre (MTC) Kohima		
1	Course Duration	June – August (3 Months)
2	Eligibility Criteria	Class X Passed Age: 18 – 35 (as on 1 May 2024)

NB:

- 1. Last Date of Submission of applications in all the category : 30th May 2024
 - 2. Date of Interview : 31st May 2024
- Applications addressed to the Director, Women Resource Development in plain paper stating bio-data, 2 (two) passport size photos, self- attested copies of the relevant marksheet, birth certificate and any other relevant documents are to be submitted.
- For Training under Multi-Training Centre (MTC) Dimapur, Applications are to be submitted to Officer i/ cMTC, Purana Bazaar, Dimapur

Sd/-
Director

US-i Israel nemsen \$1bn military teyari agütsütsü setong yangludat

Washington, Monupii/May 15 (Agencies): Biden administration-i Congress dang parnoki Israel dangi USD billion 1 alang military teyari yoktsü atema sentong yangludat, ta metetdaksüba media sangdong balala ajanga metetdaksü.

United States-i southern Gaza nung Rafah yimti amakba anemba aser civilian tem tali asüba süoki ia bilemba lemsatepbaka tang iba sentong yangludat.

US Department of State-i Mongolbarnü iba sentong ya Congress nung lepareprangshitsü atema benokogo, ta US ketdangsür kati ashiba Reuters news agency sangdong ka ajanga metetdaksü.

Teyari koba tang tashi magizüki ali, iba nung USD million 700 alang tank ammunition, tactical vehicles atema USD million 500 aser USD million 60 alang mortar round agütsütsü densema lir, ta ketdangsürtemi Associated Press news agency dang ashi.

Israel-i Gaza south nung aliba Rafah yimti amakba atema tir Joe Biden-i bomb shipment ka sota ayuba sülen hopta ka lir tang prangbong injang aser hadir balala yoktsü atema temelaba meshia temepeshiba ka agütsüogo. United Nations-i ashiba agi, Rafah nung jenoka alir million tesadang ka iba yimti nungi jenaogo.

Washington, DC nungi Al Jazeera indang osangbener Shihab Rattansi-i ashiba agi, package tasenba ya US-i Israel nem hadirtem agütsütsü atema nangzüker aliba nung shilem ka lir.

"Iba sentong ya joko mapang tatsüka asadanga arua liasü ta onok dang ashi. Israel nem hadir balala agütsütsü

atema ita aika aser küm asem tashi agitsü akok," ta pai ashi. "Ajisüaka iba ya mapang agia inyaksüba tenangzüka ka lir. Iba ya Gaza nung tang ataloka aliba dak sendaka mali," ta paisa shisem.

Tawa State Department report ka ajanga, Israel nung sepaitemi international temzüng ozüng den meputepi US-i agütsüba prangbong injangtem amshiba ngutetogo. Ajisüaka aibelen mongutet. Aibelen ngutetra Washington-i tang military teyari agüja aliba na anenadokla.

Kasa mapang nung central Gaza nung Deir el-Balah nungi Al Jazeera osangbener Tareq Abu Azzoum-i Bodhbarnü ashiba agi, Israel nung sepaitemi ali aser anüng ajanga Rafah aser Jabalia tesem asendenshir kanga sashia makdar.

"Taoba ghonda ana tsünga Gaza yimti teyongtsü nung nisung aika asüba osang angazükogo. Yimti kübok Sabra tesem nung UN-i achaayanga aliba clinic ka Israel indang jet temi amakba sülen Palestine nung ter tepsetogo," ta pai ashi.

May 6 nü nungi tang tashi nung Rafah nungi nisung 450,000 shi jenshiaogo, ta United Nations Relief and Works Agency for Palestine Refugees in the Near East (UNRWA)-i Mongolbarnü sangdong ka ajanga metetdaksü. Maneni Israel nung sepaitemi asendenshir north amakba ajanga nisung 100,000 shi jenshiaogo.

Gaza indang Ministry of Health-i ashiba agi, October 7 nü nungi Israel-i Gaza amaka tenzüka sülen tang tashi nung nisung 35,173 shi süogo aser nisung 79,061 shi yiruogo.

Biden-i taoba hopta ashiba

agi, Rafah amak dang amshitsü akok ta tsüba bilemba ajanga pai 2,000-pound (907kg) bombs aser 1,700 500-pound bombs shipment ka sota yua liasü.

House National Security Advisor Jake Sullivan-i Hombarnü osangbenertem dang ashiba agi, taoba ita agizükba sen 26bn supplemental funding bill nungi US-i military teyari maneni agütsütsü, saka bomb tem nütsünyongsük aika aliba yimti nung pokloksübaji tim masü ta bilemba agi bomb tem sota yuogo.

Senate Foreign Relations aser House Foreign Affairs committees mendenpur aser züngsemtemi bendanger den parngbong injang aser hadir balala tsütatepba dak sendakba nung lepareprangshiba senden ka ayongzüka menogo.

Biden-i Israel Ato Kilonser Benjamin Netanyahu dang, civilian tem kümzüka toktsütsü atema jenjang tapet magi-i Rafah mamaktsü mepeshia metetdaksüogo.

Gaza rara nung Biden-i Israel pusemba ajanga pa taruba küm election nung tokteptsü lia yimden yimsüsüba tsütsü pa jenjang mejungi kümogo, aser talisa lanur Democrats temi iba inyakyim pumasemer.

International Communities Organisation nung Middle East Director, Gershon Baskin-i ashiba agi, US sorkari ajungbena sentong melenshiba ya taruba küm election agitsü aliba ajanga lir ta angateter.

Kasa mapang nung Israeli military-i Mongolbarnü sangdong ka ajanga ashiba agi, taoba anogo ana tsünga parnoki Gaza Strip nung tesem 100 dak tema makogo aser Rafah yimti kübok Rafah port ana tesem balala meita oa liasü.

Ukraine nung rara atemtsü atema Putin-i China sentong agizüker

Moscow, Monupii/May 15 (Agencies): Russia Tir Vladimir Putin tongtipang teyari bushia Beijing semdangtsü lia Ukraine nung rara tembangtsü atema China indang sentong ya tejangraba tejanglia lir, ta ashi.

China Tir Xi Jinping ajurutsü atema ananü asoshi China-i aotsü lia China indang state news agency Xinhua den sensaksemba mapang, Putin-i Beijing sentong atema tenüng sanga ashi.

China-i rara atemtsü asoshi 12-point paper ka taoba küm sangdongba junga magizük. Ajisüaka taoba ita yimjak nung sangdongba yabo asangsang aser mera tajung lir, koba ajanga Cold War tangatetba shisatsü samadaksütsü, ta

Putin-i ashi.

Ajisüaka Putin-i rara atema yimjung ken o jembitsü ashiba ya anemsü lir, ta Ukraine tir indang adviser Mykhailo Podolyak-i Bodhbarnü ashi.

Putin ya Brehostibarnü Beijing-i aotsü lir, koba March ita election nung tanaben takok anguba sülen bendang limai aoba mezüngbuba alitsü aser China-i ita trok tsünga tanaben semdang alitsü. Pai ano China northeast tsütsü Harbin yimti semdangtsü.

Moscow-i February 2022 nung tashi ajak amshia Ukraine amaktsü anogo ishika lia Russia aser China nati tena tesendaktep nung telatet mali ta sangdong, saka Russia indang rara nung Beijing-i nok-

nü aser injang-bomb magütsür.

Anüolen linük temi Russia nem tenokdangba balala agütsüba mechi rongsenketzüng tsütsü China dak rangloka arur.

Iba sülen linük ana tsünga shishilempaba tsütsü asendenshi aser Russia-i jenjang talang yong energy agütsüba nungi China ajangzük.

Ajisüaka China ya United States den shishilempaba tsütsü rara nung lir, aser Russia ya anüolen linük temi tali tenük yokba ajanga Beijing shisabolur.

Mongulbarnü US-i China indang electric vehicles, advanced batteries, solar cells, steel, aluminium aser medical oset nung tenokdangba tasen agütsü. China-i telangzüba agütsütsü nangzüka lir.

Office of the AOYIM VILLAGE COUNCIL

Aoyim Village
Chümoukedima - 797103, Nagaland
Govt. Regd. No. GAB-13/17/83(Vo-I-IV) 8th Jan. 92

METETDAKTSÜR

Aoyim Village Council, Chümoukedima ajanga yamai metetdaksür:

- (1) Kilen ajaki pei indang kilen saru May 31, 2024 tashinung agütsütsüla, yimtsüng nung alirtem Rs 500/- aser dangalen alirtem Rs 1000/- alitsü.
- (2) Ali kibur shirsa land patta (Village patta) memeshi lir, parnok May 31, 2024 tashinung meshitsüla.
- (3) Ali kinur shirsa patta expiry süogo, parnoka May 31, 2024 tashinung patta renew asütsüla.

Iba sangdong sülen manidaker atema Village Council ajanga tapet mera agitsü.

Sd/-
Chairman
Aoyim Village Council
Chümoukedima, Nagaland

Sd/-
Secretary
Aoyim Village Council
Chümoukedima, Nagaland

LAND WITH BUILDING FOR SALE

- Place : Mongsenbai Ward, Mokochung Town
- Land measuring : 80/50
- RCC building, 3 rooms with kitchen (bathroom attached) and attached to main road.
- Amount: 42 lakh (negotiable)
- No brokers
- Contact No. 8131859195 / 7005435961

Kharkiv nungi Ukraine sepaitem ainshir

Kyiv, Monupii/May 15 (Agencies): Russia sepaitemi tanen makai amakba ajanga Ukraine sepaitem arütsülen Kharkiv region kübok yimtsüng aika nungi ainshio.

Sepaitemi kanga sashia amak aser northeastern region nung "advantageous positions" tajungba anai ogo, ta mitkar odongtar kati ashi.

Küm ana rara arudang Ukraine nungeri par litsü yutsür ainshiba atema iba amala oshi ya jembia arur.

Arütsü alema tsükchirtem aitba sepaitemi maziükteter aser jila aser yimtsüng kar nung kanga sashia amaker, anungji Tir Volodymyr Zelensky bendangleni aotsü aliba ajak thiogo.

Tiri aruya aliba anogotem nung bendang limai aotsü aliba sentong ajak athitsü shiogo aser anogo tasen latettsü tuyuogo, ta pa indang press secretary Sergiy Nykyforov-i ashi.

Moscow-i Lukyantski aser Hlyboke region nung nisung aliba tesem ana aser Zaporizhzhia region nunga ka agiogo ta ashir.

Ukraine-i iba indang nung telangzüba kecha agüja mali.

Sepaitemi takum wazüka ayutsü aser mesamadaksütsü mechi Lukyantsi aser Vovchansk tesemtem nungi sepaitem ainshitsü telemtetba agi, ta Ukraine mitkar indang odongtar kati sangdong ka nung ashi.

Vovchansk ya mitkar atema kanga tongtipangbo masü saka Ukraine nung temulung ajemtsü.

Tensa kanga mejungi lir saka sepaitemi Russian occupiers tem tetsüng majemokdaksür, ta mitkar indang odongtari ashi.

Tawa civilian meyerijang

aika Ukraine indang Kharkiv yimti leni jena ao. Parnok ya karbo mile 45 pilar aliba Vovchansk jila nungi dena lir.

Vovchansk indang police tekolakba, Oleksiy Kharkivskiy-i social media nung ashiba agi, kanga sashia rarar aser Russian sepaitemi jila telung nung position amenoker.

"Tensa kangasa majung lir. Tsükchirtem Vovchansk jila indang yimtongttem nung raratsü renemer," ta pai ashi.

Hokulbarnü ali atsünga aitba sülen Kyiv-i Kharkiv region-i reinforcement yoka liasü - koba Russia-i February 2022 nungi tashi ajak amshia makyonga arudang alilen nungi amakba tessashitiba ka ama züngshir.

"Sepai tali yoksemogo, aser yangji reserves tema lir," ta Tir Zelenskyy indang office ajanga Bodhbarnü ashi.

US Secretary of State Antony Blinken-i Kyiv semdangba mapang ka nung iba osang ya angashir, aser ibai taoba ita US Congress nung Ukraine nem sen billion \$61 jenjang teyari agütsütsü mulunga agizükba sülen US ketdangsüri iba yimti semdangba mezüngbuba alitsü.

Kharkiv nungi pilar southwest tsütsü Kazan region nung Ukraine-i drone amshia amakba sülen tongtipang airport ana khen atema shibanga liasü, ta Russia-i ashi. Saka Ukraine nungi telangzüba kecha agüja mali.

Russia indang Foreign Ministry odongtar Maria Zakharova-i Bodhbarnü ashiba agi, Ukraine-i Russia indang Belgorod arütsülen amakba ajanga Kyiv aser anüolen linüktemi mapa tamajung inyakba sayur.

Babar Azam-i Kohli ajateta otsü tasen ka yangluogo



Monupii/May 15, 2024

(Agencies): Ireland den tasembuba T20I asaya nung Pakistan nung asayartemi otsü tasen ishika yangluogo, aser item rongnung captain Babar Azam-i, India nung batsmen Virat Kohli-i yanglur aliba record ka ajatetba densema lir.

Mezüngbuba T20 asaya makokba sülen Pakistan team-i tanungba asaya ana koka asayamung kokogo. Mongolbarnü parnoki Dublin nung Ireland team wicket 6 agi koka liasü.

Iba asaya nung Babar-i six pongu aser four trok züka ball 42 nung run 75 yanglua liasü. Run 75 yangluba sülen pa T20I format nung batter tem rongnung run 50 dak tema timtiba yangluba asayar

kümogo.

T20 asaya nung Babar-i run 50 dak timba ya 39 ben yangluogo. Kohli-i run 50 dak timba ya 38 ben aser India captain Rohit Sharma-i 34 ben yanglur lir.

Maneni Babar ya Pakistan nung batter tem rongnung over ka nung run 25 dak timba yangluba mezüngbuba asayar kümogo.

Pa indang career nung tang mezüngbuba pai Benjamin White indang over nung six pezü züka liasü. Sixtem azükba den külemi Babar-i single ka agia over ka nung run 25 yanglua liasü.

Kasa mapang nung Babar aser Mohammad Rizwan (56) na senteper run 139 yanglua liasü. Saim Ayub-i junga masayatetba sülen tenati kanga

junga asaya-a Pakistan jenjang junga kümdaktsü.

Tenati run 139 yangluba sülen tena tsüngda iba ya 10buba-century partnership liasü. Tena ya iba alizüng tongtetba mezüngbuba tarep kümogo. Iba den tena ya run 3,000 yangluba mezüngbuba tarep kümogo.

T20 nung India nung Rohit aser KL Rahul nati run 100 dak tema ponguben yanglua lir aser Ireland nung asayar Paul Stirling aser Andrew Balbirnie nati run 2,043 yanglua lir.

Ireland nung asayamung tembangba sülen Pakistan team England-i aotsü. Headingley Carnegie nung T20I asaya pezü asayatsü aliba ya May 22 nü tezüktsü. Team ana tsüngda final May 30 nü asayatsü.

Mezüngbuba tetsür Club World Cup 2026 küm asayatsü

Monupii/May 15, 2024

(Agencies): Mezüngbuba tetsür Club World Cup 2026 küm January aser February ita asayatsü, ta Fifa-i sangdong ka ajanga metetdaksüogo.

Team 16 asayatsü aliba asayamung ya küm pezü nung khen asayatsü, aser iba asaya nung European leagues domestic season tasayadak nung tetsür Champions League group stages aser knockout rounds tsüngda asayatsü.

USA indang National Women's Soccer League (NWSL) season ya yimya agi March ita ang tenzüker.

Fifa-i alima ajunga nungi tetsürtem club asayamung ayongzüka asayatsü tejangraba aliba 2022 küm December ita sangdonga liasü, aser Fifa congress-i iba sentong ya Bodhbarnü Bangkok nung sangdongogo.

Barcelona team tang European champions lir aser

NY Gotham FC, NWSL champions aser Brazil club Corinthians-i, Copa Libertadores Femenina tesüsabuba koker lir.

Fifa congress-isa, 2026 nungi 29 tashi atema international match calendar tasen ka agizükogo. Asayartem anisüngzüktsü atema maongka timba agütsütsü asoshi international breaks trok aliba pongu kümtsüogo.

Kasa mapang nung atsülangshir aliba tebur Club World Cup asayamung koba küm pezü nung khen asayar, iba asayamung ya taruba küm asayatsü.

Maneni 2027 Women's World Cup ayongzüka asayatsü atema host linük asoshi Fifa congress-i yakta vote agitsü. Iba asayamung ayongzüka asayatsü atema Brazil den Belgium, Germany aser Netherlands nungeri longjemer bid süa lir.

Thailand Open: Rankireddy-Shetty na 2buba round-i iogo



Monupii/May 15, 2024

(Agencies): Tang Bangkok nung asaya aliba Thailand Open nung Bodhbarnü India nung tarep asayar Satwiksairaj Rankireddy aser Chirag Shetty nati mezüngbuba round asaya koka pre-quarterfinals-i iogo, ajisüaka fifth seed asayar HS Prannoy bo külem India nung asayar Meiraba Luwang Maisnam-i tsükdaksüogo.

Top seeds Satwik aser Chirag nati minute 34 nung dang Malaysia nung tarep Mohd Azriyn Ayub Azriyn aser Tan Wee Kiong na 21-13, 21-13 agi koka liasü.

India nung tarep Satwik aser Chirag na taruba round nung China nung tarep Xie Hao Nan aser Zeng Wei Han na den asayatsü.

Ajisüaka tebur kija asaya nung Prannoy bo külem India nung asayar Meiraba-i 19-21, 18-21 agi kokogo. Tena tsüngda

minute 55 asaya liasü.

Meiraba taruba round nung Denmark nung asayar Mads Christophersen den asayatsü, shibai India nung asayarsa Kiran George 21-15, 13-21, 21-17 agi kokogo.

Kasa asayamung tetsür kija asaya nung Ashmita Chaliha-i asaya ka mekoki aliba nungi meyipa tur 19-21, 21-15, 21-14 agi Indonesia tsür Ester Nurumi Tri Wardoyo koka tanabuba round-i iogo.

Ajisüaka la tanabuba round nungbo top seed China tsür Han Yue den asayatsü anungji asaya kanga melarabo masütsü.

Yue-i, mezüngbuba round nung India tsür Malvika Bansod 21-11, 21-10 agi ayong ayonga koka liasü.

Maneni Unnati Hooda-a mezüngbuba round nung tsükogo. Lai 21-14, 14-21, 9-21 agi Belgium tsür Lianne Tan mekoki liasü.

OST: Anjum & Aishwary nati tasembuba 3P qualifications kokogo



Monupii/May 15, 2024

(Agencies): Bodhbarnü M.P. State Shooting Academy (MPSSA) ranges nung asayaba 50m rifle 3 positions Olympic Selection Trial (OST) T3 qualification round tetsür aser tebur asaya, Anjum Moudgil aser Aishwary Pratap Singh Tomar nati kokogo.

Asaya yimya ama kneeling, prone aser standing position tem nung shot 20 akhaba sülen Anjum-i 592/600 score asü, koba OST asaya aruba

rongnung lai point timtiba anguba laisü. Kasa mapang nung Aishwary-ia point 600 angutsü aliba nungi point 590 nguteta tebur asayar pongu rongnung pa temaba jenjang nung liasü.

Tena ya Brehostibarnü tetokteper pezü den final asayatsü, kong point tongtibang angutsü lenmang sadema lapoka lir. Final asaya ya kanga toktepa asayatsü imlar, aser asayartem tatem tashi toktepa sülenang

takoker jangjatsü.

Tetsür 3P nung India tsürtem rongnungi number one aser finals world record holder Sift Kaur Samra-i point 589 nguteta la tanabuba jenjang nung liasü. Tetsürtem rongnung Ashi Chouksey, Nishchal aser Shriyanka Sadangi nungeria point 585 ta kasasa nguteta liasü.

Tebur 3P nung Swapnil Kusale-i kanga junga asaya pai point 587 angu, aser pa Aishwary sülen tanabuba jenjang nung liasü. Maneni tasembuba jenjang nung Akhil Sheoran liasü. Pai point 584 angu koba tails asem asayaba rongnung pai point ishitiba anguba liasü.

Teburtem rongnung Chain Singh aser Niraj Kumar napronglai point 583 ngua tena pezübuba aser pongububa nung liasü.

3P OST T3 finals den külemi tebur aser tetsür 10m air pistol OST T3qualification round-a asayatsü lir.

BILEMDANGANG

"Nisung ajakibo na mesaloktsü, anungji teshimshia shimang."